

Dithero tsa Tirelano mo Kutlwanong

27/2014 Thero ka Sontaga o o bidiwang Misericordia Domini, e le ka 04. 05. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 219 - 204/213
 2. **Thapelo:** Modimo, Rraetsho yo o mo legodimong, a puso ya gago e tle, gonne puso ke ya gago, le thata, le kgalalelo, go ya bosenangbokhutlo. Amen.
 3. Epistolo ka fa thulaganyong ya 2 e kwadilwe mo go 1 Petoro 2:21b-25;
Efangele ka fa thulaganyong ya 1 e kwadilwe mo go Johane 10:11-16.27-30.
 4. A go ipolelwe tumelo ya bokeresete!
 5. Sefela sa 233 - 218/226
 6. Thapelo ya mmadi wa thero.
 7. **Epistolo** ka fa thulaganyong ya 6 e kwadilwe mo go Bahebere 13:20-21, e re: "Mme Modimo wa kagiso o o ntshitseng Jesu Morena wa rona mo baswing, yo e leng Modisa yo mogolo wa dinku ka madi a kgolagano e e sa khutleng, a o lo nonotshe mo go sengwe le sengwe se se siameng gore lo dirafatse thato ya ona o o dirang mo go lona se se o kgatlang ka Jesu Keresete; a kgalalelo e nne ya gagwe ka bosakhutleng! Amen." Amen.
 8. **Thero:** Barategi mo Moreneng Jesu Keresete, mafoko a dipuiso tsa kajeno mo tirelong-Modimo di godisa kgang e le nngwe fela, e e leng kgang e kgolo mo go rona badumedi, ba re leng bana ba Modimo ka kolobetso, a godisa Jesu Keresete, fa e le Modisa wa batho ba gagwe yo e leng Modisa wa rona, yo e bileng e le Modisa yo o molemo. Jesu a itshupa a re: Ke nna Modisa yo o molemo. Lefoko leo le lentle. Jesu Keresete ke Modisa wa rona, e bile ke Modisa yo o molemo. Ga a tshwane le balalediwa ba ba se nang dinku tse e leng tsa bone. Ga a tshwane le badiredi ba ba sa reng sepe ka dinku tsa morena wa bone. Ga a tshwane le barapiwa bao ba ba tshabang, fa ba bona phiri e tla, ba tlogela dinku tsa bone, ba sa kgathalele dinku.
- Motho mongwe le mongwe yo o ruang dithuo o itse gore thuso e tlhokega go tlhokomelwa thata, motshegare le bosigo motho o tshwanetse go itse gore dithuo tsa gagwe di fa kae, di

ntse jang. Tseo re di utlwa mo Efangeleng ya kajeno. Temana e e laolang Sontaga ono e re: Keresete a re: Ke nna Modisa yo o molemo. Dinku tsa me di utlwa lentswe la me, ke a di itse, mme di ntshala morago. Ke di naya botshelo jo bo sa khutleng. Ga di ka ke tsa latlhega, le e seng go timela, le fa e le ka motlha ope; ke gona ga go ope yo o ka di phamolang mo seatleng sa me. Le ka lefoko leo re senolelwa lorato lwa ga Jesu Keresete, o e leng Modisa yo o molemo wa rona ba re leng dinku tsa gagwe, tse e leng dithuo tsa gagwe. O a re itse, le rona le utlwa Lefoko la gagwe. Ke gore le rona re a mo itse. Ga re sale ope morago, le fa e le mang yo o ikayang modisa wa rona, gonne re itse Lefoko le e leng la nnete, e bong Lefoko la ga Jesu Keresete. Kereke ya Lutere mmogo le Martin Luther e ipolela sentle mo Diartikeleng tsa kwa Šmalkaldiye malebana le Kereke, gongwe phuthago ya ga Jesu Keresete, e re: "A go lebogwe Modimo; gonne le ngwana wa dilemo tse di supang o a itse gore kereke ke eng, fa e le badumedi ba ba boitshepo le dinku tse di utlwang lentswe la Modisa wa tsone." Ka mafoko ao a boipolelo jwa Kereke ya Lutere re re: Phuthago ya ga Jesu Keresete ke letsomane le le boitshepo la gagwe.

Ka e le Modisa wa rona, re ipolela ka bopelokgale jo bogolo mafoko a Pesalome ya kajeno e e reng: "MORENA ke modisa wa me, ga nkitla ke tlhoka sepe. O mpothisa mo mafulong a matalana, o nkgogela kwa metsing a tapoloso. O lapolosa mowa wa me; o ntsamaisa mo ditseleng tsa tshiamo ka ntlha ya leina la gagwe. Le fa ke tsamaya mo mogorogorong wa moriti wa loso, ga nkitla ke boifa bosula bope; gonne o na le nna. Tsamma ya gago le seikokotlelo sa gago di a ngkomotsa." Barategi mo Moreneng, Pesalome eo e re: Ga ke boife bosula bope! Gape mo mafokong ao re utlwa ka ga lebaka le le dirang gore re se ka ra boifa, le re: "Gonne wena, modisa yo o molemo, o nna le nna. Ke ka ntlha ya moo fa bana ba Modimo ba sa boife. Jesu o nna le rona. Modisa wa rona yo o molemo Jesu Keresete o tsamaya le rona mo botshelong jwa rona. Ga re boife, gonne Modimo o nna le rona.

A re utlweng Lefoko la thero ya kajeno, le le reng: "Mme Modimo wa kagiso o o ntshitseng Jesu Morena wa rona mo baswing, yo e leng Modisa yo mogolo wa dinku ka madi a kgothagano e e sa khutleng, a o lo nonotshe mo go sengwe le sengwe se se siameng gore lo dirafatse thato ya ona o o dirang mo go lona se se o kgatlang ka Jesu Keresete; a kgalalelo e nne ya gagwe ka bosakhutleng!" Le mo bokhutlong jwa Lokwalo go Bahebere mokwadi wa lokalo loo lo a kgothatsa, o tiisa badumedi, gape o boka Modimo. Mo Lefokong lena la thero o galaletsa Modimo, le go re kgothatsa, o tiisa rotlhe ba re buisang lokwalo loo.

Jesu Keresete o tsositswe ke Modimo Rraagwe mo baswing, a re rekolola ka madi a gagwe. Jesu Keresete o re golotse, a re rekolola mo maleong otlhe, le mo losong le mo thateng ya ga Satane ... ka madi a a boitshepo a gagwe. Jesu Keresete a re ithekela gore re tsene mo letsomaneng la gagwe. A re reka ka madi a gagwe gore re nne dinku tsa gagwe. A beela botshelo jwa gagwe ka ntlha ya dinku tsa gagwe gore re gololwe, re nne dinku tsa letsomane la gagwe. Madi a ga Jesu Keresete a re rekolola. Re a buisa gore "jaanong he, ba ga etsho, e re ka re na le phuthologo ka madi a ga Jesu go ka tsena mo Felong-ga-Boitshepo ka tsela e ntšhwa e e tshelang e o e re buletseng go ka ralala lesire, ke gore ka nama ya gagwe, e re ka re bile re na la moperesiti yo mogolo yo o okameng Ntlo ya Modimo: A re atameleng he ka dipelo tsa boammaaruri, re na le tumelo e e tletseng, re kgatshitswe dipelo, go tlositswe matswalo, re bile re tlhapisitse mebele ka metsi a a phepa. A re kgomareleng boipolelo jwa tsholofelo, re se tshikinyege; gone ene o boikanyo yo o re solofeditseng. A re elaneng tlhoko gore re tlhotlheletsanye mo loratong le ditirong tse di molemo, re se tlogele go phuthega ga rona, jaaka bangwe ba tlaetse, mme re kaelane, bogolo thata ka lo bona letsatsi le ntse le atamela," Baheb. 10:19-25. Ka mafoko a o Modimo o rata go re tiisa mo tumelong e e reng: Re mo letsomaneng la ga Jesu Keresete ka kolobetso. Ka kolobetso re tsenye mo letsomaneng la Modiso yo o molemo. A re tlhokomeleng gore re se tsamaye, re sale yo mongwe morago, yo e leng motimetsi, re re timidisiwe ke motho, mme re nnele ruri mo letsomaneng la ga Keresete, re utlwe Lefoko la gagwe, re fule mo mafulong a gagwe, re se tsene mo masimong a nyobe ya ga Satane, le fa re ka re: Ntšhe ya sukiri ya ga Satane e monate. A re gopoleng gore ntšhe ya sukiri ya ga Satane ga e tshedisi, e a bolaya.

Modimo o kopa ka mokwadi wa lokwalo lo go Bahebere gore re tshedisiwem ke go baakanyediwe tsotlhe tse di molemo tsa ona, re dirafatse thato ya ona. Ga re kgone go dira tse di molemo ka thata ya rona, mme re kopa mo Modimong wa kagiso gore o re romele Mowa o o Boitshepo wa ona gore o re nonotshe, o re tshedise, o re tsoseletse gore re dire tse di siameng, re ungwe maungo a a monate ka bopelotlhomogi jwa ona. A Modimo o re thuse gore re nne dinku tse di siameng mo matlhong a ona, tse di o kgatlang, re se tlole ditaolo tsa ona, re se timediwem ke mewa e e bosula, re se timele, mme re sale Jesu Keresete morago ka metlha, re utlwe Lefoko la gagwe, re mo galaletse ka go mo sala morago, le ka go mo utlwa.

A Modimo wa rona o re goge jalo ka metlha, re utlwe Lefoko la gagwe, re mo sale morago ka boitumelo. A Modimo o re thuse mo go tseo! A tlotlo e nne ya ona go ya bosenangbokhutlo. Amen.

9. Thapelo: Modimo, Rara yo o mo legodimong, o re abele Mowa wa gago o o Boitshepo gore re nne dinku tse di molemo tsa ga Morwao, re se lape go sala Jesu Keresete morago yo e leng Modisa yo o molemo wa rona. O re bolokele mo letsomaneng la gago, go ya mo bofelong jwa lefatshe. Re kopa jalo mo leineng la ga Jesu Keresete, yo e leng Modisa yo o molemo wa rona. Amen.

Thapelo ya Morena: Rara wa rona yo o mo legodimong ...

10. Sefela sa 231 - 217/225

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.